

## Ol Holide i Laik Kamap Nau

Long dispela yia pestode bilong Krismas na Nuyia i kamap long Sarere. Olsem em i pasin bilong ol Australia bai ol i holide long Mande tu. Olsem yu lukim, ol dispela de ol i holide:

Sarere - Desemba 25

Sarere - Janueri 1

Sande - Desemba 26

Sande - Janueri 2

Mande - Desemba 27

Mande - Janueri 3

Long yia 1972 de namba 31 bilong Janueri em i holide tu: em i Australia De.

## Planti Kendidet Moa

Long de namba 29 bilong Novemba ol man i laik insait long resis politik bilong kamap memba bilong nupela Haus Asembli, i stat long putim nem bilong ol long buk bilong gavman.

Bihain long wanpela wik tasol, i gat moa olsem 100 nem i stap.

Ol i tok se long sampela hap o ifektoret i

gat inap 20 man i laik traim strong bilong ol.

Dispela taim ol kendidet hia i mas gat poto bilong ol i stap long pepa bilong vot. Na sapos ol i bilong wanpela bikpela politikal pati, bai pati bilong ol i makim wanpela tokman bilong brotkas 6-pela taim long redio stesin.

Ol liklik pati na ol man nating i no ken mekim toktok long ol politik long redio.

Em i taim bilong krismas nau na i gat samting olsem 250,300 sumatin i kam bek long ples.

Tasol 18,500 i no belgut; ol i bel hevi. Long stendet 6 i gat 22,000 skulboi na skulmeri i mekim ekseminesen pinis. Tasol 3,500 tasol bai inap long go het, long go long haikul.

Bilong wanem narapela 18,500 i tarangu i pas pinis? Ol i longlong? Ol i no gat inap save? No-

gat. As bilong trabel em hia: i no gat inap haikul tasol.

Wanpela wanpela bilong dispela bikpela namba bai inap painim liklik wok. Na ol arapela bai i mekim wanem?

Ol i no laik stap long ples, na long ol taun i no gat inap wok.


Dispela kain trabel i save kamap long ol nupela kantri. I no long Papua New Guinea tasol.

Long yia 1971 Papua New Guinea i gat dispela lain manmeri long skul:

Praimeri skul	...220,000
Haikul	.....20,000
Teknikal, vokesenel	6,500
Yunivesiti	.....1,030
Tisa Koles	.....2,100
Teknoloji Institut	...320
Aprentis	.....350

Long yia 1970 i gat 19,841 sumatin i pinisim stendet 6 na 6,500 inap painim ples long haikul tasol long dispela yia i gat ples bilong 3,500 tasol long ol haikul.

Yumi mas gat moa bikskul. Tasol tok i kamap ol i laik pasim sampela.



Long tingting bilong wanpela Chimbu, Krismas long New Guinea i olsem.

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prinim nem bilong yu tru, orait yu raitim arapela nem bilong yu tu.

## No Laikim Plak

Dia Edita.-Mi tingting long dispela plak Mis Susan Karike wokim plak, na em yet amamas tru long putim antap. Tasol mi lukim long Papua New Guinea ol bilasim, ka o trak, o basket. Na bilasim haus. Tasol mi lukim plak kamap bilak na yelo na kumul antap long plak em i no stret. Em i putim kumul antap long plak i no stret.

Plak bilong Australia em i winim nupela plak. Planti Papua New Guinea ol amamas tru long plak bilong ol.

Husat man i laik bekim pas?

Keri Tumun Tomga Jimi.

## Sik Sifilis

Dia Edita.-Insait long Kantri bilong mipela, I gat wanpela rabis kain sik. Ol i kolim Sifilis. Mi harim long Lae na Goroka inap long Chimbu na Banz, dispela kain sik i kamap moa.

Tru mi wanpela bilong Gembogl, tasol mi i no laik long ol dispela kain sik. Taim mi lukim piksa, dokta i soim mi, mi pret nogut.

Olsem wanem ol pamuk meri ol i raun long taun! na ol i salim bodi bilong ol nabaut na ol i pulim mani: God i tambu, em i tok yu no ken bagarapim bodi bilong yu na bilong arapela man.

Bilong wanem ol man meri i no pret long bagarapim bodi bilong ol. Wari bilong mi i olsem: Tru police em inap long painimaut ol dispela sikman-meri.

Trabel i stap we? Plis

em i no gat paua long haus sik.

Plis wantok askim ol gayman ol i lukautim dispela sik. Sifilis em inap bagarapim ol man meri long New Guinea. Harim dispela sik em i ken bagarapim pikinini long bel bilong meri. Olsem pikinini i ken kisim dispela sik tu. Plis telimautim dispela wari long ol man long kantri bilong mi.

Mr. Wamugl Michael Gembogl Chimbu.

## Pasin Plisman

Dia Edita.- Mi laik autim wanem wari mi gat, em long ol plisman bilong yumi long Wewak i save mekim.

Hia nau liklik wari bilong mi. Planti taim mi lukim o harim ol plisman bilong yumi hia i save mekim dispela kain pasin i no stret. Em, long taim ol man i dring long hotel o long taven na kirap i laik pait, o i go pundaun slip, o mekim sampela kain hambak pasin. Ol plisman i lukim olsem bai ol i go holim, kikim long ain su bilong ol. Pulpulim i go bai ol i supim i go insait long ka bilong ol i gat banis waia long en, na kisim i go long haus simen, larim ol tarangu i slip olsem dok.

Ol plisman i mekim olsem, mobeta ol i kisim ol dispela spakman na bringim i go long ples we ol i save stap.

Sapos, yu wanpela plisman i ritim dispela tok na i gat wari, orait yu rait tasol i go long Wantok Niuspepa bai mi ritim.

Henry H.S. Moku Wewak.

## Plis Apim Mani

Dia Edita.-Yes ol wantok mi gat bikpela wari tru. Mi harim namba bilong mani bilong haikul. Olaman mipela man bilong ples bai mekim wanem? Mipela i no gat bikpela bisnis. Wantaim o tu taim long wanpela yia mipela i save salim kopra. Tasol i no planti bek 3 o 4 bek tasol.

Olsem ol memba bilong haus Asembli i mas toktok long dispela samting tu. Na apim prais bilong kopra. Wan bek kopra i mas baim \$20 dola i stret.

Na apim tu mani long ol boi bilong yumi i go wok long taun, na long plantesin long totnait.

Ol memba bilong Haus Asembli plis toktok na apim mani bilong kopra na ol boi bilong stesin. Jo. K. Madang.

## Meri Bai Ranim Kantri

Dia Edita.- Mi laik bekim liklik pas bilong John Bive. John Bive i tok olsem. Ol tisa i save helpim ol meri tasol na bringim ol i go long haikul. Yes, wantok John, watpo tru yu tok olsem? Yu ting haikul bilong ol man tasol? Mi ting olsem. Sapos ol meri i gat haikul edukesen na bihain marit bambai ol i ranim gut tru ples na sindaun bilong ol. Yu ting edukesen i stat we? Em i stat long mamapapa yet long ples.

Sapos mama i gat edukesen bambai i save yet long skulim pikinini bilong em long gutpasin bipo i go skul long arapela ples.

Nau tu yu tok ol meri bai ol i kam bek tasol na stap nating long ples

bihain. Ating i no trutumas dispela tok bilong yu.

Yu lukim, sampela meri nau i stap long redi anaunsa, taipis, laibrar: na ol arapela wok. Ol dispela wok i helpi kantri bilong yumi. A: bilong yu i pas yet? Wanpela de bihaintaim bambai ol meri i ranim kantri bilong Papua New Guinea.

Jo. A. Rovitto Bougainville

## Misin Laikim Meri

Dia Edita.- Mi laik autim wari bilong mi. Dispela wari bilong mi: olsem. Wanpela pasin ol New Guinea man na wait skin ol i mekim i no stret.

Olsem ol hetman long ol kain wok olsem haus sik, skul, olsem ol tisa: ol i save mekim dispela pasin. Na planti taim mi lukim ol Misin mekim dispela kain pasin. Olsem ol i putim ol meri long gutpela haus ah olsem bilong ol masta Tasol long ol boi ol: no mekim olsem ol meri nogat tru. Ol i putim ol long rabis haus, wankai olsem haus pasindia.

Ating mi ken tok olsem waitman na New Guinea man ol i inap kisim 4-pela o 3-pela meri samting. Bilong wanem, ol save mekim gut long ol meri, na ol i laikim ol. Na ol i mekim gut long ol.

Na dispela pasin mi pela lukim na i no stret tru. Ating ol Misin ol gat spesel lo long luk autim ol meri gut, olsem na mi no klia na mi askim yupela. Em tasol. Sapos husat man o meri: laik bekim tok bilong mi i no stret long em, orait rait tasol i go long Wantok Nius.

Seth Robin N. Menyamy.

## **Givim Gude**

Dia Edita.- Plis ol pren mi save wakabaut long rot na mi save lukim ol yangpela meri long moningtaim o long apinun na apinun long ol o moning long ol, na ol i no save bekim. Moning bilong mi olsem wanem long ol, ol i save kros o nogat maus bilong ol na ol i no save bekim moning o apinun bilong mi olsem na mi tok aut long yupela, na mi ting olsem, nating ol i save hambak tasol.

O olsem wanem long mi nating mi rabis man olsem na ol yangpela meri ol i no save bekim moning bilong mi. Na ting ol i no skol? Tasol i luk olsem ol i skol.

Olsem na mi tok save. Husat man o meri o singel meri em i ken wari pastaim.

Henry Bade  
C.M.T. Manam Is.  
Madang.

## **Kaikai Mani**

Dia Edita.- Wanpela pasin mi lukim longtaim long Goroka. Mi ting em i no stret. Wanpela man i gat wok long taun. Olsem em i painim mani long em. Nau mi lukim planti pren bilong em, i kam lukim em. Ol i sindaun nating no gat wok. Ol i pinisim kaikai bilong wokman. Samtaim ol i stilim samting long arapela man o stua. Stilman i kamap.

Wari bilong mi i olsem. Watpo gavman o taun kaunsil bilong Goroka o plis i no mekim wanpela lo long salim man i nogat wok long Goroka, i go kwik bek long ples bilong em.

Les pasin i kirapim stil pasin. Tasol strongpela lo i ken helpim man i stap stret long ples bilong em. No sindaun

long kaikai mani long pren bilong em.

Plis Wantok autim dispela wari bilong mi long olgeta manmeri na helpim ol long kirapim wanpela lo long dispela pasin.

Mr. Lukas Taul  
Chimbu.

## **Baim Balus i Go**

Dia Edtia.-Mi bin ritim wanpela pas long Wantok Niuspepa em Veronica Duba i raitim. Long dispela pas Veronica i toktok long ol man i save toktok planti long ol meri i save toktok planti long ol meri i save putim sotpela sket. Em i tru, mi ting em tingting bilong ol man i tru long wanem taim mama bilong Veronica i karim em, mama bilong em i no givim sket na pasim. Taim em bikpela liklik em bin pasim purpur long ples na dispela taim tu mi bin i stap long ples na mi lukim em long ai bilong mi. Tasol taim em kisim save, em nau, em i laik tanim olsem misis stret tasol em bai i i lus. Baim balus na i go long ples Veronica. Em ol meri bai ol i lus tru long pasin sotpela sket long wanem mi tok pinis mama bilong em givim purpur na em i pasim i no pasim sotpela sket.

Gabriel Kaspar Jack  
Bogia/Madang.

## **Meri Smokim Ol Tru**

Dia Edita.- Mi laik bekim pas bilong wantok ia Philip Namtane. O yes wantok em gutpela yu putim sampela point long putim sotpela sket. Tasol mi no amamas long ritim sampela hap.

Yu tok olsem yu no ken lukim misis na seksek. Na olsem wanem long yupela ol man? Yupela wokabaut yet olsem ol tum-

buna bilong mipela? Yupela karamapim lip tasol na wokabaut? Olsem yu tu i no bihainim waitman na putim trausis, snot, su, soks na Nektai? Yupela ol man sampela, yupela ting olsem, yupela tasol ken bihainim we bilong ol waitman na lukluk i go daun long ol meri olsem samting nating. Taim ol meri i laik bihainim sampela we bilong ol waitman yupela toktok planti.

So yu save nau wantok i no yupela ol man tasol i ken bihainim pasin olsem na kantri bilong yumi Papua New Guinea i ken kamap.

Tingting gut mipela ol meri i no ken sindaun bihain olsem bipo na ol man tasol antap. Olsem sapos yu lukim ol meri bihainim sampela we bilong misis mobeta yu no toktok planti.

María Kapak  
Sepik.

## **Givim Pawa Long Kaunsil**

Dia Edita.- Long sampela taim i go mi bin harim wanpela tok i kam long wanpela L.G. Kaunsil, long Redio Wewak. Ol i tok long ol man i no baim kaunsil takis. Bai kaunsil klak i mas go na kisim ol i kam long kot.

Taim mi harim dispela mi pilim i no stret tru long tingting bilong mi.

Em hia ol poin bilong mi. Mi ting i no stret long kisim kiap wantaim. 1.) Kaunsil i wanpela kain Gavman. Na em i gat pawa long kotim man i no baim kaunsil takis. Kaunsil i mas soim em i gat pawa. Na sapos oltaim singaut long kiap long helpim klak. Dispela i no soim olsem kaunsil i gat pawa. Em i mekim ol man ol i pret long kiap. Tasol Kaunsil?

2.) Mi laik askim ol kaunsil. Wanem mining bilong pepa hia ol i kolim "Samo"? I gat strongpela oda long em o

nogat? Na sapos i gat bilong wanem askim helpim bilong ol kiap?

3.) Mi ting i taim nau bai yumi bilong Papua New Guinea i mas bihainim ol tok na lo bilong ol kaunsil bilong yumi. Bikos dispela em i namba wan step long Selp Gavman na Independens.

Long pinisim tok bilong mi. Mi laik tok klia olsem mi no mekim dispela bikos ol kiap i waitskin. Nogat. Mi mekim dispela bikos mi laikim ol pipel bilong yumi i mas bilip long ol Tok, Wok, na Lo bilong kaunsil bilong ol. Bikos dispela i hap bilong selp gavman.

John Konalali,  
Franciscan Mission  
Tumleo.

## **Pisin Tok Ples Tru**

Dia Edita.- Yes planti taim mi ritim wantok nius na ol arapela Kantri i save tok bilas long tok pisin bilong yumi Papua New Guinea. Na mi pilim dispela long tingting bilong mi i no stret.

Na mi ting olsem tok Motu i no tok ples bilong yumi olgeta nogat mi ting em i tok ples bilong arapela kantri tasol.

Na tok inglis tu i no tok ples bilong yumi Papua New Guinea. Mi ting tok inglis tu i tok ples bilong arapela kantri tasol.

Na tok pisin yes em i namba wan tok ples tru bilong Papua New Guinea na mi ting olsem yumi i no inap long tok bilas long tok ples bilong arapela kantri bilong yumi.

Em dispela i no stret long ai bilong God. Long wanem olgeta samting bilong dispela graun i kamap long laik bilong God yet.

Christopher Semp  
Nuku/Wewak.

# Politikal Edukesen

## Poto Long Ol Pepa Bilong Vot

Dispela taim bai i gat nupela pasin bilong putim poto bilong wanpela kandidate long pepa bilong vot bai ol man i ken luksave long ol.

Em i gutpela tingting tasol nau i gat sampela trabel i kamap.

Ol i no save bai i gat hamas kandidate long wanpela wanpela ilektoret. Na sapos i gat moa long 20, bai ol i mekim wanem samting? I gat wanem samting? I gat ples bilong 20 poto tasol long wanpela pepa bilong vot.

Na wanpela samting moa tu... Ol i mas soim ol dispela kain piksa bilong ol kandidate bipo long taim bilong vot. Bai ol i mekim olsem wanem?

Inap long de namba 29 bilong Desemba ol i no ken save bai i gat hamas kandidate. Ol i mas prinim samting olsem 5 milion (5,000,000) pepa bilong vot. Na ol i mas go nabaut long olgeta hap bipo long de namba 19 bilong Februeri. Long dispela de bai vot i bigin.

Ol i traim pinis dispela pasin bilong putim poto long pepa bilong vot na em i gutpela tru long helpim ol man i no save rit na rait; ol i ken lukim poto na luksave long kandidate.

Mista Tore Lokoloko, namba tu spika bilong kaunsil bilong namba wan gavman, i tok bai ol i traim yusim poto long olgeta ilektoret.

Sapos i gat moa long 20 kandidate, ol i no i-

nap.....na ol i lusim ol poto olgeta na nem tasol bilong kandidate i kamap long pepa bilong vot.

Sapos ol i no gat poto bilong wanpela kandidate, bai ol i no ken prinim poto bilong ol arapela long wanpela ilektoret.

Bilong ol dispela samting nau de bilong stat long vot em i de namba 19 bilong Februeri na i no de namba 12, olsem ol

i bin tok pastaim.

Dispela taim long Papua New Guinea ol politikal pati inap long autim tingting bilong ol long redio yet.

Long ai bilong gavman i gat 3-pela politikal pait tasol: Pangu, Yunaitet, Pipels Progres. Gavman i ting ol arapela liklik lain i no pati tru, long wanem ol i no gat planti man long ol arapela hap bilong kantri.

I gat sampela lo bilong 3-pela pati i laik toktok long redio.

Wanpela wanpela pati i ken toktok 6-pela taim


inap long 10 minit. Dispela 6-pela toktok i ken brotkas long olgeta 8-pela stesin bilong gavman.

Ol toktok hia i ken kam long tok inglis, tok pisin, o tok motu.

Ol tokman hia i mas autim ol tingting bilong politikal pati bilong ol yet. Spika hia i no ken singaut long vot bilong ol man bai em yet i ken winim ileksen. Nogat.

Olgeta stesin i mas brotkas dispela program bilong ol politik namel long de namba 30 bilong Desemba na de namba 18 bilong Janueri.

# Saun bilong SANYO gutpela tumas



Sanyo i ken mekim yu makim draipela redio, stat long 8 transista i go kamap draipela samting tru em inap long kisim stesin long we. **Wonem kain samting yu laikem long harim, Sanyo i gat.**

Soim istap antap emi piksa bilong 11XA853. Emi namba wan 10 transista redio bilong harim tok long olgeta graun. Long han rait emi 8 transista redio ino hevi na isi gutpela redio em bai klia saun sapos yu kisim long we stesin.

**LUKIM SANYO  
ISTAP LONG STUA  
LONG HAP BILONG YU**

**BRECKWOLDT & CO. (N.G.) PTY. LTD.**

Port Moresby,  
Box 1549,  
Boroko.

Madang,  
Box 185.

Lae,  
Box 557.

Rabaul,  
Box 222.

Mt Hagen,  
Box 237.

Wewak,  
Box 178.

Kieta,  
Box 72

# PES BILONG OL PIKSA I WIN



Krismas long New Guinea (Mik)



Ples bilong yu i gat pis inap long dispela? (Sal)



Hepi Krismas long yu! (Jon)

## LUKIM GUT DISPELA HAP TOK

*Planti poto moa i bin kamap pinis.*

*Tasol planti i nogut tru, i no inap mipela i ken putim long niuspepa.*

*Mipela i no baim olgeta poto yu salim i kam long mipela. Nogat.*

**HARIM GUT. LUKIM GUT: MIPELA I BAIM OLGETA POTO MIPELA I PRINIM LONG DISPELA PES LONG NIUSPEPA. EM TASOL**

*Tasol yu traim. Ating yu gat sampela gutpela poto. Salim i kam. Yu ken winim wan dola.*


*Salim poto i kam long:* WANTOK  
P.O. BOX 298  
WEWAK



Em i namba wan taim mipela i bin lukim balus. (Hane)



Sampela kaving i bung i laik go long maket. (Sal)



Nupela pasin bilong waswas sapos i no gat baret i stap. (Veronica)

**LOT NUMBER**  
68/5050

**Australian Importer's Bulletin**

**LIMITED OFFER**  
Subject to Terms Below

\*\*\*\*\*

Spring, 1971, Edition

\*\*\*\*\*

# CLEAROUT OF SWISS AMPHIBIAN WATCHES HELD IN AUSTRALIAN GOVERNMENT BONDED

## WAREHOUSE ONLY \$15.99 LIMIT: READER

### FORCED TO SELL ENTIRE STOCK OF 1971 MODEL FOR ONLY A FRACTION OF THE REGULAR PRICE

The Bargain Clearout Offer described in this Australian Importer's Bulletin is for a short time only. Special discount prices apply only to men's 1971 deluxe model. Genuine Amphibian Watches have long been a favourite of Scuba Divers and active men throughout the civilised world. Goods have been held in Australian Bonded Warehouse, due to non-payment of storage and customs taxes. Now at last they are being released direct to the public at a fraction of regular prices. Watches sold on a first received, first mailed basis. Fast delivery assured. All orders processed within 48 hours of receipt. **LIMIT: Only ONE (1) watch to a reader at this reduced price.**

#### BRAND NEW 1971 DELUXE MODELS

These Scuba Divers' watches are brand new, in original factory packing. New, unbreakable Ebelium mainsprings. New, heavy-duty cases with rear closures of rugged, thick STAINLESS STEEL. Each watch absolutely **WATER RESISTANT**—hermetically sealed, then depth tested under water. These watches are warranted to withstand **6,000 POUNDS (3 TONS)** of undersea pressure per sq ft surface. Every watch has been equipped with a rugged **INSULATOR**—the time-honoured Swiss invention that gives it exceptional resistance to shocks, jolts, and constant rugged use. None offered to stores or watch jobbers.

**AMAZING COMPUTOGRAPH DIAL HAS MANY SPECIAL APPLICATIONS**  
A unique, revolving **COMPUTOGRAPH** Dial is mounted on the outer rim of the Amphibian. This great development of Swiss technology has numberless applications in industry, business, sports, and the professions. Aids in timing speed of boats, cars, auto races. Useful for shop operations, photo-lab work, football, soccer, boxing. **Special Lapsed Time function** reminds of dates, business appointments. **Reduces overcharges on phone calls. Prevents overtime parking fines. Over 97% of all watches made do not yet have this great modern convenience.**

**ONE OF THE WORLD'S STURDIEST WATCHES EVER DEVELOPED IN OVER 300 YEARS**

The Amphibian was originally made for deep-sea divers or frogmen. Their very lives could depend on a rugged, heavy-duty watch. Therefore, the clever watch masters of Switzerland engineered it to withstand staggering stresses and pressures—*without crushing or breaking down*. To accomplish this, they gave it unusual resis-



SHOWN BELOW IS GUARANTEE GIVEN WITH EACH AMPHIBIAN WATCH

### 5-year Guarantee

All defective parts furnished at no cost

**PROCUREMENT COUPON** (below) at once. Upon receipt of same, one (1) watch will be mailed to each purchaser. Description of watch and full details of this importer's clearance offer are printed below.

**SPECIFICATIONS OF WATCH OFFERED IN THIS BULLETIN**

The following are detailed specifications for this nationally advertised watch. (A) TYPE: Genuine Amphibian—ideal for use on land, undersea, or in space. (B) CASE: Standard diameter—measuring 1 1/2 inches across. Ruggedly made with a special Bolt-On back of 100% stainless steel, burnished to a satin finish. Latest Astronaut-inspired design. (C) WORKS: Precision Swiss parts assembled in a renowned factory in TRAMELAN, Switzerland. Movement has integrated calendar section that changes date every 24 hours at

the stroke of midnight. Works are inspected and electronically timed before insertion into the case. (D) WATER RESISTANT: This amazing watch is water resistant (not just "semi" water protected). User needs only to keep crown, case and crystal intact to preserve water resistance. Special internal rubber seals keep out water, dust, grime and grit—the four great enemies of watches. (E) BUILT-IN RESISTOR: This device gives positive resistance against damage from shocks, rough usage, jolts, etc., etc.

**USED BY ACTIVE MEN IN OVER 25 COUNTRIES**

This amazing watch is not used only by Scuba Divers. Well over a million men—in all walks of life—own Amphibian watches. These are executives, professionals, business leaders who are tired, frustrated and angry with fragile, flimsy watches that are always breaking down. You'll also see this type of watch on the wrists of brawny construction

men at work, army and naval officers, aviators, golfers, bowlers, tennis players, etc. Famous in over 25 countries 'round the globe, it's truly a prized possession for men of action—a masterpiece of contemporary design! Makes an excellent birthday or Christmas gift. Now available to you at a deep-cut, clearance price—while current warehouse stock is available.

WANPELA KAMPANI BILONG AUSTRALIA I SALIM DISPELA TOK I KAM LONG MIPELA BAI MIPELA I PRINIM LONG NIUSPEPA NA OL RIDA I KEN BAIM DISPELA HANWAS. OL I NO GAT PLANTI. YU KEN BAIM WANPELA BILONG YU STRET. HARIAP.

Samting bilong man o meri i smat moa .....  
Blakpela hanwas i lait long nait.....  
I no ken bruk inap 5-pela yia .....  
Yu ken swim wantaim em.....

*Ol rida, yupela i no ken lusim ting long baim kastam taim was i kam long Australia.*

**Listing of Some of the 35 Special Features Found in this Watch**

- Hermetic Pressure-sealed Case
- Guaranteed Water Resistant\*
- Built-in X-7 Shock Resistor
- 50-minute All-purpose Timer
- 3 Luminous Timing Hands
- Rotating Outer Dial
- 2 Independent Dials
- Precision Second Calibrator
- Date-O-Matic Calendar Window
- Glowing Underwater Dial
- Checks and Times Parking Meters
- Bomed Unbreakable Crystal
- Built-in Lapsed Time Computer
- Anti-magnetic Movement
- Ebelium Unbreakable Main Spring
- Solid Stainless Steel Screwback
- Times Factory Operations
- Times Horse and Auto Races
- Business Appointment Reminder
- Tropical Rot-proof Strap
- Fine Jewellers' Finish Gasing

\* Provided case, crown and crystal are intact.

strong it takes months, even years of treatment that could ruin an ordinary watch in 5 minutes. A watch so dependable and well-engineered that it carries a 5-year Service Certificate.

**FREE 7-DAY EXAMINATION**

Purchasers may examine, use and try one (1) watch without risk or obligation. This timepiece is absolutely guaranteed to give satisfactory performance. Otherwise return for immediate refund by return mail.

**PLEASE OBSERVE CAREFULLY**

This is a strictly LIMITED CLEAROUT OFFER. It is subject to all the Rules and Conditions shown in coupon. Please do read and follow these easy rules. This will prevent delay and ensure prompt delivery to your home.

**TO ORDER WATCH, PLEASE USE THIS SPECIAL PROCUREMENT COUPON**

To Classique Imports, P.O. Box 75, Red Hill, Qld. 4059.

**RULES AND CONDITIONS (PLEASE OBSERVE WITH CARE)**

1. Only ONE (1) genuine Amphibian watch per reader at special discount price of \$15.99
2. No phone or C.O.D. orders.
3. Add 80 cents for postage, handling and full insurance to your home. Deluxe Gift Box and 5-year Guarantee Certificate given with watch.
4. 7-day free examination and trial permitted. Satisfaction guaranteed or money back.
5. This offer is for prompt acceptance. Orders received too late will be returned immediately to sender.

Print Name.....

Address.....

City.....

State..... Postcode.....



Katim dispela tiket na salim wantaim sek inap \$16.79 i go Tong:

Classique Imports  
P.O. Box 75  
RED HILL, QLD. (4059)

Watpo yu salim \$ 16.79 i go ...  
Hanwas i kostim ..... \$15.99  
Bilong baim pos ..... .80  
\$16.79

# savemeri i tok



Em hia DOKTA MARGARET MEAD, meri i save tumas Tong ol samting bilong New Guinea. Long yia 1928 na 1929 em i sindaun i stap long Manus. Long yia 1931 inap 1933 em i stap long Karawap na Biwat na Chambri long Is Sepik, Distrik. Em i sindaun tru olsem ol pipel bilong ples, pasim purpur olsem ol arapela meri.

Em i raitim 3-pela buk long ol pasin bilong New Guinea.

I no longtaim em i kam bek gen na raun na lukim ol pipel. Em i stap insait long wanpela kibung bilong ol tisa samting na em i autim tingting bilong em. Em hia nau sampela hap tingting bilong Margaret Mead.

## PASIN BILONG OL SKUL

Skul em i gutpela samting, tasol nogut yumi ting man i gat bikpela save, em i winim olgeta arapela man.

I gat planti kain save yumi no save kisim long skul tasol.

Sapos olgeta manmeri go long bikskul tasol, husat bai i wok kopra na winim-man i long ples? Husat bai wokim ol haus na gaden na kamapim ol famili? Bikpela save tasol i no mekim bikpela kantri, nogat. Bikpela man bilong wok, yes.

Em i rong bilong olgeta pasin skul long ol kantri: ol i hatwok long givim save long wanpela wanpela man o meri. Laip

bilong planti man, maski.

Nogut yumi long New Guinea i kamap olsem ol man bilong Switzerlan o Swiden: ol i no laik wok wantaim han bilong ol, ol i singautim ol rabisman bilong arapela kantri long mekim. Ol i skul tumas. Ol i hambak.

## TOK PISIN:

Long tingting bilong mi, ol praimer skul i mas yusim tok pisin. Bi-hain tok inglis i ken kam insait long skul.

Em i rong ol i givim dispela nem pisin long tok ples yumi save yusim

long olgeta hap. Sori. Sampela man i no laikim dispela nem na olsem tu ol i no laikim dispela tok ples. Tasol em i no stret. Dispela tok ples em i samting tru bilong New Guinea.

## OL SKUL LIVA:

Long olgeta ples yumi mas kirapim wanpela klap bilong ol yangpela man. Bai ol i gat nem bilong klap na haus bilong ol stret. Ol lapun bilong ples i mas skulim ol long ol pasin bilong wokim kanu, bilong sapim ol diwai, bilong olkain wok long ples.

## KAGO KALT

I no gat kago kalt

long hap bilong Fiji na ol kantri bilong ol arapela wansolwara. Bilong wanem?

Bikos ol waitman i kam long dispela ol ples longtaim bipo...taim ol waitman yet i save wokim ol samting em i bringim.

Olsem na ol pipel i lukim em inap wokim sip na haus na ol samting olsem na ol i no kirap nogut.

Tin mit na masin na ol samting bilong ain - we stap wanpela waitman hia i save wokim? No ken. Em i kisim we? Em i kisim tasol. Kisim we? Husat inap long wokim? Husat i ken save?

# NAMBA WAN TIM LONG TERITORI

Long gutpela tim olgeta man i mas bung na wok wantaim.

Wanpela wanpela i mas save gut long wok bilong poroman bilong em.

Dispela em i pasin tru bilong Ansett Airlines bilong Papua New Guinea.

Yu ken pilim: mipela olgeta manmeri bilong Ansett, mipela i bung wantaim, i wok wantaim.

Yu kam long ofis na yu laik baim tiket.

Wantu, yu ken lukim mipela i gat planti saveman moa.

Man o meri i raitim tiket bilong yu, man i makim ples bilong yu long balus, man i kisim kago bilong yu,

mekanik i redim balus, ol kagoboi bilong balus,

ol boskru bilong balus, kepten bilong balus -



olgeta manmeri hia ol i save moa long wok bilong ol stret.

Ol i olsem wanpela tim tru.

Ol i win moa.

Tru tumas:

ol i namba wan tim long dispela Teritori.

# ANSETT

**AIRLINES OF PAPUA NEW GUINEA**

in conjunction with ANSETT AIRLINES OF AUSTRALIA

2131/154



## Wokboi Nating No Ken Go Long Bougainville

Namba wan gavman, Mr. L.W. Johnson i bin wari moa long ol wokman nating i go long Bougainville.

Em i tok long mun Oktoba i gat 609 man i bin go, 555 man ol wokman nating. Ol i no gat save long mekim ol kain kain wok.

Ol man, kampani yet i bin kisim ol, ol tasol i ken go long Bougainville.

Em i tok sapos ol man i go nating, no gat wok, o mani bai ol i kalabusim ol. Sampela long ol dispela man ol i bin kalabusim pinis. Ol i no gat wok na mani na ples bilong slip.

## Nupela Presiden Long Rabaul Kaunsil

Nupela presiden bilong Rabaul Taun Kaunsil em i Mista Henry Francis Chow.

I gat tupela vais presiden long dispela kaunsil. Mista Andrew Siegers em i olupela vais presiden na Mista Boas presiden.

Long namba wan miting Mista Henry Francis Chow em i bin toktok long 3-pela samting.

(1) Long lukautim wok bilong karim pipia long taur.

(2) Long stretim sindaun bilong ol skwata.

(3) Long kirapim moa ples bilong pilai.

Samting olsem 150 memba olgeta ol i bin go long dispela miting.



## Mista Barnes Opim Haus Kaunsil

Minista bilong ol Teritori, Mista C.E. Barnes i bin kamap long Maprik long namba 24 de bilong Novemba na opim nupela haus kaunsil bilong Maprik Lokal Gavman Kaunsil.

Dispela nupela haus kaunsil ol i bin wokim long simen. Em i nupela kain haus, na em i makim nupela we bilong laip.

Tasol ol bikpela raunpela pos ol i sanapim ausait, dispela i soim pasin bilong ol tumbuna.

Mista Barnes i bin tok olsem tu, ol kaving bilong Sepik i kamap pinis long olgeta hap bilong graun.

Em i tok, em i bikpela samting tru long olgeta wok bilong kaving na bosim gut.

Mista Barnes i tok ol pipel bilong Papua New Guinea mas bungim olgeta pasin bilong tumbuna wantaim ol nupela pasin ol i kisim long Australia.

Em i tok dispela nupela haus kaunsil em i bilong olgeta pipel bilong

Maprik i ken lukim.

Ol pipel yet i baim pinis long ol kaunsil takis bilong ol.

Ol arapela pipel i stap insait long dispela de bilong opim Maprik Lokal Gavman Kaunsil em tupela memba bilong Haus Asembli, Mista Michael Somare na Mista Pita Lus; Mista Jim Mckinnon, Komisina bilong Lokal Gavman, Mista K. Williams, namba tu distrik komisina bilong Is Sepik Distrik; Mista Stevens; Kaunsil Presiden Kaisman, na Vais Presiden Mista Ulisimbi.

Bihain ol i opim nupela Huas Kaunsil ol i mekim bikpela singsing ausait long haus tambaran.

Mista Barnes i bin amamas tru long lukim samting olsem 10,000 pipel i bin kamap long dispela singsing.

Ol spika i tok ol pipel long hap bilong Maprik i soim olsem ol samting i no save kamap nating. Ol i kamap long hat wok tasol.

## Gutpela Bisnis

Wanpela bisnis ol i kolim Buang Transpot Grup i statim bisnis ol i kolim Buang Taksi Traks long Port Moresby. Bisnis Promosen Senta i helpim ol. Ol i kisim pinis 3-pela taksi laisens long dispela yia. I gat 32 man bilong Mumeng Sab Distrik long hap bilong Morobe i kirapim dispela bisnis.

Dispela lain i gat 37 trak na 25 long ol i gat PMV laisens pinis. Ol dispela nupela taksitrak i gat gutpela sia bilong sindaun na gutpela rup.

Ol bai laik kisim 15 laisens bilong 15 taksitrak. Ol i gat tupela klak bilong lukautim ol ofiswok na wanpela mekanik bilong fiksim ol takistrak.

Ol dispela lain i redim pinis 4-pela nupela taksitrak na ol i ting bai ol i redim 4-pela moa.

## Kisim Gutpela Trening

Ol pipel bilong ples Rangulit long hap bilong ol Baining ol i mekim pinis wanpela Komyuniti Senta bilong ol.

Em hia nem bilong ol dispela tripela ples: Rangulit, Malasait, na Kumbi.

Ol i wokim dispela Komyuniti Senta long 2 wik.

Ol man i amamas tru long dispela senta long wanem nau ol meri i ken kisim planti kain trening na skol.

Mani ol i yusim long dispela senta i liklik tasol bilong baim ol nil.

Long dispela senta bai ol meri i kisim trening long ol welfe ofisa long lainim wok bilong kuk, samap, na haijin.

# tok win

poro i raitim

**WANPELA NIUSPEPA MOA**

Yunaitet Pati i bin statim wanpela niuspepa bilong en stret. Nem bilong en UNITED NEWS.

Em bai kamap olgeta tupela tupela wik na bai i go inap 10,000.

Pepa hia i kam long Port Moresby na edita em i wanpela meri bilong Amerika, nem bilong em Ann Conte. Ol i prinim tok inglis, tok pisin, na tok motu insait long en.

Pangu Pati i gat wanpela niuspepa bilong en stret. Em i winim 2-pela yia pinis.

Kain niuspepa olsem dispela tupela yumi save kolim politikal niuspepa bikos ol i givim tingting bilong pati bilong ol tasol.

Niuspepa olsem WANTOK em i no bilong wanpela pati. Em i givim spes na tok bilong olgeta pati wantaim.

**PIK I MAK BILONG**

**KAUNSIIL**

Long Kerema Lokal Gavman Kaunsil ol i makim pik i olsem mak bilong kaunsil bilong ol. Dispela mak bai ol i putim long olgeta pepa bilong ol.

Ol man bilong Kerema i gat stori bilong wanpela pik bilong ol tumbuna nem bilong em Ila-Karata, em i kam kilim i dai planti manmeri bilong ples Kerema.

**WEL PAM GADEN BAI BRINGIM HAMAS MANI?**

Wanpela wel pam gaden em inap long 15 eka. Taim olgeta tri bilong en i karim gut, em inap winim \$2000 long wanpela yia. Em inap olsem \$80 long wanpela wanpela fotnait.

I gat 1,412 kain gaden

olsem long hap bilong Hoskins. Nau tasol ol i singaut long 256 man moa i ken kam kisim smolpela gaden olsem long ples ol i kolim kavui.

Man i laik kamap fama hia i ken kisim dinau long beng tu. Tasol em i mas promis bai em i stap inap 7-pela yia. Sapos em i no wok gut na i les bai ol i tekewe bek dispela graun bilong em.

**LAIKIM TUMAS REDIO**

Ating yu save i gat planti man moa i harim

redio long Papua New Guinea? Yes, em i tru.

Long yia i go pinis ol lisena yet i bin salim 245,013 pas i kam long 8-pela redio stesin bilong gavman. Bilong baim stem bilong ol dispela pas ol man hia i lusim inap long \$12,250. Man, em inap mani long baim 3-pela trak.

**INDEPENDENS I GO WE?**

Mipela hia long WANTOK i bin tanim long tok pisin platform o as ting-

ting bilong 3-pela bikpela pati bilong Papua New Guinea. Yu bin lukir las taim long niuspepa bilong yumi.

Tasol mipela i kalap nogut tru bikos mipela i no bin painim dispela tok INDEPENDENS wanpela taim long as tingting bilong olgeta 3-pela pati wantaim. Nogat tru.

• Olsem wanem? Ol pati i lusim ting long independens? O ol i no save tru independens i wanem samting?

WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK

# Niuspepa bilong yumi stret!

# KISIM PRAIS NATING

Sapos yu baim WANTOK inap long wanpela yia (\$4.00) bai mipela i salim kwiktaim wanpela gutpela PRAIS long yu.

Yu man bilong New Guinea, yu mas amamas long olgeta samting bilong New Guinea stret. Dispela niuspepa WANTOK em i bilong yumi stret. Em wanpela tasol inap autim ol tingting bilong ol pipel bilong New Guinea. Long dispela pepa yumi inap tokaut na ol waitman i no inap ritim. Taim bilong ileksen i laik kamap nau. Mipela bai skulim yu long olgeta kain politikal pati tu....i no long wanpela tasol. Orait, yu laik amamas wantaim planti arapela man, yu kisim WANTOK inap long wan yia.

Yu salim \$4.00 (foa dola) i kam na bai dispela prais tu i kam long yu. Bai yu amamas tru long en. Bai i no gat wanpela narapela man long hap bilong yu i gat wanpela....Yu wet, bai yu lukim em i tru....bai yu gat namba...yu wanpela. Bai yu hepi tru.....

WANTOK PUBLICATIONS INC., P.O.Box 298, WEWAK

Yu katim dispela hap pepa na salim i kam bek wantaim \$4.00

Dia WANTOK

MI LAIKIM PRAIS I KAM NATING LONG MI.

Em hia \$4.00 (foa dola) bilong kisim WANTOK inap wan yia olgeta.



Nem bilong mi:.....

Adres bilong mi:.....

WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK \* WANTOK



# TOK I KAM LONG OLGETA HAP



## India Na Pakistan i Pait

Wanpela bikpela woa o pait i bin kirap. India i pait wantaim Pakistan, em wanpela kantri i stap arere long en.

Stori i go olsem: Kantri Pakistan i bruk tupela hap. Wes Pakistan i longwe moa long Is Pakistan. Olsem na Is Pa-

kistan i laik bosim hap bilong en yet. Tasol namba wan gavman bilong Wes Pakistan, Yahya Khan, i no laik na i kalabusim lida bilong ol Is Pakistan, nem bilong em Sheik Mujibur Rahman.

Nau gavman bilong Wes Pakistan na ol soldia bilong en i go insait na i ranim planti pipel moa long Bangla Desh, em i nupela nem bilong Is Pakistan. Ol soldia hia i kilim planti pipel moa na samting olsem ten milion i ranawe i go long kantri India. India yet i rabis long kaikai na olsem bikpela wari na trabel i kamap long en.

Klostu olgeta dispela manmeri i ranawe i bilong lotu bilong Hindu. Na Pakistan em i kantri bilong ol Muslim. Tupela lotu oltaim tupela i pait.

Long dispela taim i

gat planti man insait long Is Pakistan i no laik tru long gavman i krungutim ol. Olsem na ol i hait insait long bus na ol i redim wanpela

## Helpim Papua New Guinea Inap 1978

I gat gutpela nius bilong Papua New Guinea i kam long Englan. Gavman bilong Englan i tok em i no ken lusim Papua New Guinea.


Englan i go insait long koman maket. I olsem em i bung wantaim 6-pela arapela kantri bilong Yurop na ol i save baim ol samting long ol memba bilong ol yet.

Tasol Englan i tok em i laik baim ol kopra na kopi na pairitrum na ti long Papua New Guinea inap long yia 1978.


Dispela i gutpela nius bikos nau ol bishisman bilong yumi i ken bel isi.

Englan i tok Papua New Guinea i wok yet long go het na i nupela kantri na olsem ol arapela bikpela kantri i mas helpim em.

Long yia i go pinis Papua New Guinea i bin salim ol samting long Englan inap long \$19 milion dola.



Indira Gandhi



Yahya Khan

ami bilong ol. Dispela lain nem bilong en Mukti Bahini.

Orait long wik i go pinis, India i kirap na kalapim arere bilong kantri Is Pakistan na i kirapim pait bilong putim hevi long ol soldia

## laikim redio stesin

Manus Lokal Gavman Kaunsiil i laikim wanpela redio stesin bilong Manus stret na olsem ol i bin givim nating wanpela hap graun, arere long haus kaunsiil bilong ol, bai i go long dispela wok wailles.

Mista Donatus Mola, Minista bilong Dipatmen bilong Nius na Toksave - Infomesen na Ekstensen Sevisis - i tok em i hepi tru long dispela tingting bilong kaunsiil.

Ol kaunsiila i ting ailan bilong ol i mas gat stesin bilong en yet sapos ol i laik go het gut tru.

## tin pis

Wanpela deliget bilong Wewak/But kaunsiil i laik save ol man i ting wanem long no kirapim dispela faktori bilong wokim tin pis long Wara Sepik.

Mista Pita Lus, memba bilong Haus Asembli bilong Maprik i tok strong dispela faktori i mas stat. Em i tok dispela faktori i ken givim wok long planti ol boi i lusim skul long standet 6. Ol i salim pas i go long kaunsiil bilong namba wan gavman bilong kisim save long ol.

## tok i dai

Presiden Komp Dei bilong Mt. Hagen na presiden Momba Ombo bilong Asaro-Watabung kaunsiil, tupela i kibung long Goroka bilong stretim tok bilong ol draiva i ran long Hailans Haiwe.

Wanpela mun bipo wanpela trak i kapsait na 6-pela man bilong Wata-

bung i dai pinis. Draiva bilong trak em bilong Mt Hagen.

Olsem na ol man bilong Watabung i belhat na i pasim ol trak i kam long Hailans Haiwe na i laik bekim na mekim save long ol arapela draiva bilong Mt. Hagen.

Tupela presiden hia: Momba Ombo na Komp Dei i bin stretim tok long bekim pe long ol famili bilong ol man i dai pinis long dispela bagarap.

## lukautim ples balus

Wantoat Lokal Gavman Kaunsiil long Morobe Distrik i bin bungim moa long \$11,000 takismani.

Ol man long dispela hap i tromoim \$7 na ol meri inap wan dola.

Dipatmen bilong ol Wok i bin givim wok bilong lukautim gut ples balus bilong Wantoat long dispela kaunsiil, na olsem bai ol inap winim samting olsem \$162,000.

## ileksen bihain tasol

Mista Tore Lokoloko, tekman bilong kaunsiil bilong namba wan gavman, i tok bai Gazelle Lokal Gavman Kaunsiil i no ken putim ileksen inap long Jun.

Long wanem nau mipela olgeta i stap insait long taim bilong ileksen bilong Haus Asembli na bai planti man i long-long sapos i gat tupela ileksen wantaim.

Taim bilong Gazelle Lokal Gavman Kaunsiil i pinis tru long de namba 12 bilong Disemba. Tasol Mista Lokoloko i tok em i ken i stap inap long de namba 12 bilong Jun.

## nupela kaunsiil

Long Bamu long Balimo sap-distrik bilong Papua ol i bin statim wanpela nupela gavman kaunsiil.

Ol man hia i hepi tru long wanem ol i wet wet longtaim moa.

Samting olsem 2,500 pipel i sambai lukim memba bilong Saut Fly, Mista Ebia Olewale, i bin kirapim namba wan miting bilong nupela kaunsiil.

Ol man i bin ilektim Mista Nanuka Edae presiden na Mista Aidai Gageu vais presiden bilong Bamu Kaunsiil.

## wokim nupela hotel

Ol kaunsiil bilong Westen Distrik bilong Papua i orait long wokim wanpela haus pasindia o hotel long Daru bai ol man i kam limlimbur ol i ken sindaun gut.

Ol kaunsiil bai givim \$4000 dola long dispela haus.

## kaunsiil bakstua

Mista David Kine, het-

man bilong Sevis bilong Baim long Lae i givim gutpela toktok long ol deliget bilong Lokal Gavman Kaunsiil Asosiesen i bung long Goroka.

Baim Sevis bilong ol Lokal Gavman em i wanpela bikpela bakstua long Lae.

Mista Kine i tokim ol, dispela stua inap long helpim ol kaunsiil hari-apim ol wok bilong ol. Ol inap baim olkain samting hariap na long gutpela prais i daunbilo.

Em i tok 12-pela kaunsiil i bin baim ol trakta na buldok na arapela masin long dispela bakstua Goroka Lokal Gavman Kaunsiil i bin baim 200 taia bilong trak long dispela Baing Sevis.

Tasol ol 156 kaunsiil bilong Papua New Guinea i mas baim long dispela bakstua. Sapos nogat, bai em i no inap go kamap long olgeta hap bilong kantri.

## KLASIFAIT

### PABLIK NOTIS

BUK PREA. Yu laikim buk long beten long nait? Salim pas long Booklet, Box 1096, Boroko. Kisim nating.

Wantok Publications P.O. Box 298, Wewak, i wokim, na Wirui Pres long Wewak i prinim.

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

Nau yu ken baim dispela buk:

## Pasin Bilong Kristen Mama


Em i soim wok bilong ol mama long lukautim haus na kaikai na klinpasin na pilai bilong ol pikinini na gutpela rot bilong prea na song na amamas.

Salim oda i go long:

## KRISTEN PRES

Sales Division  
The Christian Book Centre  
Box 222, Madang

# Krismas



Hepi Krismas ol wantok. O yes ol brata, bikpela pestode i kamap pinis. Yumi hepi tru. Yumi amamas tru. Em i taim bilong holide. taim bilong pati, taim bilong raun lukim ol pren, ol wantok. Taim bilong sosial na malolo.

Tru ol dispela samting i gutpela samting tru tasol tude mi laik tokaut liklik long yupela olgeta man long as bilong dispela bikpela pestode bai yupela ken klia long mining bilong en na tingting stret long en.

I olsem: Taim God i wokim man, em i laik bai olgeta man i mas stap pikinini bilong em na go long heven. Tasol mipela bagarap long sin bilong Adam na dua bilong heven

i pas pinis.

Husat inap stretim dispela rong? Huset inap long opim dua bilong heven. Mipela man i no inap. Mipela man i no gat strong long stretim dispela bikpela rong i kamap pinis. No gat wanpela man i gat namba long stretim, maski king, bikman o kiap. Tasol God Papa i sori long yumi na em i salim Pikinini bilong em, Jisas Kraist, long kisim bek yumi. Jisas i kam i stap namel long yumi. Em i kamap man, olsem na em i inap long karim pen na peim sin bilong ol man.

Na Holi Spirit i mekim Maria i mama bilong Jisas. Pikinini bilong God i kamap olsem olgeta pikinini long bel bilong mama bilong em. Na God i

askim Maria pastaim long maus bilong ensel. Em i laik stap mama bilong paman o nogat? Maria i bekim tok: Laik bilong God yet. Mi laik bihainim laik bilong em tasol. Maria i karim Jisas long Betlehem na paman bilong yumi i statim wok bilong em bilong baim bek heven bilong yumi.

Yumi ol Kristen i hepi tru long dispela bikpela marimari bilong God. God i salim Pikinini bilong em, long peim sin na rong bilong yumi, bambai yumi kamap pikinini bilong Papa gen. Olsem Papa i mekim gut long yumi.

Long ol dispela samting yumi ol Kristen i amamas tru na yumi gat bikpela pestode bilong Krismas. Em i wanpela bikpela pestode tru bilong yumi.


Orait, mi pilim olsem. Long dispela pestode yumi i gat tupela samting yumi mas mekim sapos yumi laik holim gut ol wok bilong dispela pestode.

1) Yumi mas tenkyu long God. Pikinini bilong God i marimari long yumi na baim bek heven bilong yumi long hatwok bilong em. Orait nau em i taim stret bilong givim bikpela tenkyu long em.

2) Yumi olgeta i mas wanbel. Ol Tolai, Morobe, Chimbu, Australia, Sepik, Saina, Buka, Papua-yumi olgeta i mas wanbel. Bilong wanem? Yumi olgeta i wanfamili tasol. Yumi olgeta i gat wanpela Papa, God Papa. Yumi olgeta i brata, yumi olgeta i wantok tru. Orait yumi mas helpim na mekim gut long olgeta arapela man.

Em dispela tupela samting em i as tingting tru bilong Krismas. Orait yumi ol Kristen i mas traime bihainim.

Em tasol liklik tok bilong mi na mi laik tok gen long yupela olgeta man, Hepi Krismas.



Olgeta tok  
i stap long dispela niuspepa  
ol i bin paitim pastaim  
long wanpela masin bilong rait.  
nem bilong em . . .

# Olympia

TERRITORY AGENTS

## BRECKWOLDT & CO. (N.G.) PTY. LTD.

PORT MORESBY  
P.O. Box 1549, Boroko.

MADANG  
P.O. Box 185.

LAE  
P.O. Box 557.

RABAU  
P.O. Box 222

MT HAGEN  
P.O. Box 237.

WEWAK  
P.O. Box 178.

KIETA  
P.O. Box 72.

1972



**JANUERI**

san	man	tun	trin	fon	frai	sar
						1
2	3	4	5	6	7	8
9	10	11	12	13	14	15
16	17	18	19	20	21	22
<del>23</del> <sup>30</sup>	<del>24</del> <sup>31</sup>	25	26	27	28	29

**FEBRUERI**

san	man	tun	trin	fon	frai	sar
						1
	2	3	4	5	6	7
	8	9	10	11	12	13
	14	15	16	17	18	19
	20	21	22	23	24	25
	26	27	28	29		

**MAS**

san	man	tun	trin	fon	frai	sar
						1
				2	3	4
				5	6	7
				8	9	10
				11	12	13
				14	15	16
				17	18	19
				20	21	22
				23	24	25
				26	27	28
				29	30	31

**EPRI**

san	man	tun	trin	fon	frai	sar
						1
2	3	4	5	6	7	8
9	10	11	12	13	14	15
16	17	18	19	20	21	22
<del>23</del> <sup>30</sup>	24	25	26	27	28	29

**ME**

san	man	tun	trin	fon	frai	sar
						1
	2	3	4	5	6	7
	8	9	10	11	12	13
	14	15	16	17	18	19
	20	21	22	23	24	25
	26	27	28	29	30	31

**JUN**

san	man	tun	trin	fon	frai	sar
						1
				2	3	4
				5	6	7
				8	9	10
				11	12	13
				14	15	16
				17	18	19
				20	21	22
				23	24	25
				26	27	28
				29	30	

**WANSPEPA BILONGA YUMI OLGETA**

© 1972 WANSPEPA BILONGA YUMI OLGETA